



**PENGERUSI JAWATANKUASA
KIRA-KIRA WANG NEGARA (PAC)
MERANGKAP AHLI PARLIMEN ROMPIN**
PEJABAT JAWATANKUASA KIRA-KIRA WANG NEGARA
PARLIMEN MALAYSIA, JALAN PARLIMEN
50680 KUALA LUMPUR

Tel : 03-2601 7263 / 2698 6852 (DL)
Faks : 03-2698 9218
Email : pacparlimen@parlimen.gov.my
Laman Web : <http://www.parlimen.gov.my/pac>

3 November 2016

**KENYATAAN MEDIA YB DATO' SRI HASAN BIN ARIFIN, PENGERUSI JAWATANKUASA
KIRA-KIRA WANG NEGARA (PAC) PARLIMEN MENGENAI LAPORAN PAC
PENGURUSAN PROJEK PEMBANGUNAN KANDUNGAN PENYIARAN DIGITAL DI
BAWAH KEMENTERIAN KOMUNIKASI DAN MULTIMEDIA.**

- 1) PAC Parlimen hari ini, membentangkan Laporan PAC berhubung Pengurusan Projek Pembangunan Kandungan Penyiaran Digital di bawah Kementerian Komunikasi dan Multimedia yang dilaporkan dalam Laporan Ketua Audit Negara Tahun 2013 Siri 2 dan dibentangkan di Parlimen pada 16 Jun 2014.
- 2) Prosiding terhadap isu ini, dibincangkan PAC Parlimen pada 11 November 2014 dan Dato' Sri Abdul Rahim Mohamad Radzi, Ketua Setiausaha Kementerian Komunikasi dan Multimedia dan Dato' Abu Bakar Ab Rahim, Ketua Pengarah Penyiaran hadir di hadapan PAC Parlimen bagi memberikan penjelasan terhadap isu-isu yang dibangkitkan.
- 3) Dalam prosiding berkenaan, PAC Parlimen membangkitkan isu-isu seperti berikut:
 - i. Perbelanjaan perolehan program bagi saluran TV1 dan TV2 berjumlah RM43.70 juta adalah di luar skop projek PKPD tanpa mendapat kelulusan Unit Perancang Ekonomi dan Perbendaharaan;
 - ii. Perolehan program saluran TVi berjumlah RM111.83 juta telah melebihi peruntukan sejumlah RM21.79 juta (24.20%) bagi tempoh tahun 2011 hingga bulan Jun 2013;
 - iii. KKMM tidak memohon peruntukan pembangunan tambahan bagi membiayai tanggungan berjumlah RM61.78 juta;
 - iv. Sebanyak 71 program (16.67%) telah siap tetapi lewat jadual, manakala 78 program (18.31%) masih dalam pelaksanaan tetapi melebihi tempoh kontrak asal. Kelewatan pelaksanaan antara 15 hari hingga 14 bulan;

- v. Sebanyak 15 program telah diberi kelulusan lanjutan tempoh kontrak melebihi sekali, manakala 8 program diberi kelulusan lanjutan masa selepas tarikh tamat tempoh kontrak;
 - vi. *Liquidated Ascertained Damages* (LAD) berjumlah RM182,142 tidak dikenakan terhadap 42 program siap yang melebihi tempoh sah laku kontrak;
 - vii. Keseluruhan 413 program yang bernilai melebihi RM50,000 setiap satu tidak mempunyai kontrak formal;
 - viii. Terdapat 75 program tidak dikemukakan bon pelaksanaan berjumlah RM0.86 juta, manakala 53 program bon pelaksanaan tidak meliputi 12 bulan selepas tarikh tamat kontrak; dan
 - ix. Perolehan 366 program berjumlah RM88.04 juta tidak didaftarkan sebagai harta modal Kerajaan.
- 4) Sehubungan itu, PAC Parlimen membuat rumusan bahawa:
- i) Mengambil maklum mengenai penambahbaikan yang diambil Kementerian Komunikasi dan Multimedia (KKMM) serta RTM terhadap isu-isu yang telah dibangkitkan.
 - ii) KKMM dan RTM memantapkan lagi kawalan terhadap urusan pembayaran serta perolehan yang membabitkan kandungan penyiaran bagi memastikan rakyat benar-benar mendapat manfaat daripada wang yang dibelanjakan.
 - iii) Mahu KKMM dan RTM memastikan setiap prosedur dan pekeliling berhubung tatacara kewangan yang disediakan Kerajaan dipatuhi sepenuhnya bagi mengelakkan berlaku ketirisan dan penyelewengan.
- 5) PAC Parlimen mengesyorkan kepada Kerajaan beberapa perkara seperti berikut:
- I. Perancangan perolehan perlu dibuat dengan rapi dan mempunyai koordinasi antara pihak-pihak yang terlibat.
 - II. Menyediakan perancangan pembelian program bagi tempoh 2 atau 3 tahun ke depan.

- III. Memastikan peruntukan mencukupi sebelum sesuatu komitmen dibuat. Komitmen yang melebihi peruntukan dapat menjejaskan perancangan RTM pada masa akan datang. Sehubungan itu, setiap perolehan perlu dibuat perancangan yang rapi dan memerlukan koordinasi antara KKMM dan RTM.
 - IV. Pengurusan kontrak dilaksanakan mengikut peraturan dan garis panduan yang telah ditetapkan.
 - V. Kerajaan perlu memastikan RTM menghasilkan produk yang berkualiti selaras dengan peruntukan yang telah diberikan dan rancangan Kerajaan bagi langkah pengkoprtan RTM perlu disegerakan.
- 6) Orang ramai yang berminat untuk membaca dan meneliti Laporan PAC Parlimen berhubung Projek Pembangunan Kandungan Penyiaran Digital di bawah Kementerian Komunikasi dan Multimedia boleh memuat turun (*download*) laporan berkenaan di laman web PAC di alamat www.parlimen.gov.my/pac.

Yang Berhormat Dato' Sri Hasan Arifin
Pengerusi Jawatankuasa Kira-Kira Wang Negara
Parlimen Malaysia